

GHT CANAVAR AYIN 30-da SEFAA TOPLANACEK

Eni seçilân, sayıya görâ, beşinci Gagauziya Halk Topluşun birinci toplantısı Canavar ayın (oktabri) 30-da saat 11-dâ başlayacak.

Bölâ Kararı imzaladı Gagauziya başkanı Mihail FORMUZAL.

Toplantıda lââzim ayırılân GHT Başı, onun yardımcıları hem GHT komisiyaların başları.

Açıklandı, ani GHTnın ilk topluşuna teklif edilmiş katılınnar Moldovanın öndercileri: prezident, premyer-ministru, parlament başı hem Moldova parlamentin gagauz deputatları.

FIRTINA ÖNCESİ SESSİZLİK

Bu yılki GHT seçimnerinädân Gagauziyanın üstündä dört yıllık temelsiz hem boş esân fırtına iki-üç ay geeri yavaşadı. Gagauziya Halk Topluşun seçimnerinâ girdii gibi da o fırtına sansın heptân durgunduydu.

Bu üzerä da, bezbelli, GHT seçimneri delikat geçti hem o seçimnär gösterdi kim bu dört yılın içinä havada lüzgär yapardı. O lüzgär yapannarın kandidatları GHTya geçämedilär. Taa doorusu onnar için insan kendi oylarını vermedi. Sanmasınnar, ani insan susêr da bişey görmeer. Sıra geldiynän insan kendi karakterini hem bakışını açıklêr da kof ötenneri kırık yalak yanında brakêr.

Seçimnär bittiynän fırtınayı genâ hızlandırmâa başladılar. Ama boşuna. Kof ötennär çekettilär baarmâa, ani onnar seçimneri kazanmışlar. Ama iki-üç aftanın içinde belli oldu, ani baarmaklar bir “boş sandık çıktı” da fırtına genâ kesildi.

Fırtınanın cansız esmesi peydalandı ba bir saytta, ba başka saytta: seçimneri kaybedennär bildirerlär, ani onnar seçimneri “kazanmışlar” da GHT başında onnarın kandidatu mutlaka olsun lââzim. Koyulacak kandidaturalar da sansın belli oldu: Fedor GAGAUZ (“Edinaya Gagauziya”dan, M.FORMUZALın adamı), Georgi LEYÇU (baamsız deputat, Komunistlär partiyasının kandidatu), Dimitriy KONSTANTİNOV hem Demyan KARASENİ (“Eni Gagauziya”dan) hem taa birkaç kişi. Son sonunda görüner, ani ilk toplantıda GHT başına sırada olan ilk üç kandidat teklif edilecek. Kimi seçecek sadâ bir Allaa hem deputatlar biler.

Unutmayalım, ani politika meydanında yapılmêr hem politikanın alt sularını hiç birisi bilmeer. Başka türlü yaşamak keyfsiz olaceydı.

Son iki afa içinde Gagauziyada seçimnär uurunda bir sessizlik çöktü. Acaba bu fırtına öncesi sessizlik mi? Bileräk büünkü günädân fırtınaları yaratannar kimdi – bu ölä da var. Enidän başlayan fırtına yok edärsä kendi yaratannarını – bu pek islää. Sadâ Gagauziyamızı yok etmesin da okadar!

BU GÖSELLİİ LÄÄZİM SADÄ SİİRETMAÄ

Türkiye Respublikasının 89-cu yıldönümünâ karşı (kutlanılêr Canavar ayın (oktabri) 29-da) Kişinevda “Geçmişân büünkü günâ kadar” sözleri altında Osmannı zamanından bu günâ kadar karı giimnerin Defilesi oldu. Başta Türkiye Büükelçisi Mehmet Selim KARTAL hem Canabisinin eşi Banu Cankan KARTAL hanum-efendi olarak, Defileyi Moldovada Türkiye Büükelçilii hazırladı.

Canavar ayın (oktabri) 27-dâ Kişinevun “MallDova” alış-veriş merkezindâ, Defileyi siiretmää deyni, üzlärçä insan toplandı. Defilenin açılışını Türkiye Büükelçisi Mehmet Selim KARTAL yaptı. Canabisi urguladı, ani bu Defilede gösterilecek Ankara Olgunnaşma İnstitutun kolektiyalarından birisi hem kısadan annattı bu institutun zaametleri için.

Ankara Olgunnaşma İnstitutu 1958-ci yılda kuruldu. Ozamandan beri, büünkü günâ kadar, türk giyimini hem el zanaatlarını aaraştırêr, büünkü günâ hem gelecää onnarı taşıyêr. Bunarı unutmamaa hem bozmamaa deyni üüredicilik yapêr.

İnstitutta çalışan insannarın zaametinnän burada çeşitli giim kolektiyakarı toplandı. Bu kolektiyalarda bulunan giimnerdä Anadoluda yaşayan karılar ilmek-ilmek annadêrlar kendi duygularını, özlem-



nerini, düşlerini, tabiatta gördükleri çiçekleri, renkleri. Bu giimnerdä herbir renigin, herbir motifin bir annamı vardır.

Büükelçi Mehmet Selim KARTAL konuşmasında açıkladı, ani gösterilecek kolektiyada Defileya gelennär (Sonu 2-ci sayfada).



TİKAdan ÇADIRA STADİON

TİKAnın yardımınnan Çadır kasabasının stadionu enilendi. Burada skemnelär, tribünalar hem çimen enidän kuruldu. Döşendi trotuarlar, düzüldü aulcuklar.

Şindi stadion sevindirer hem futbolcuları hem da siiredicileri.

Bu stadionda uygun oldu Moldovanın “A” divizionunda matçları oynamaa. Bu üzerä dâ, bezbelli, taa stadiyon açılınca çadırdaki “Saksan” futbol



klubu eni stadionda oynayan taa ilk matçta 3:0 ensedi Moldovanın “Real Succes” futbol komandasını.

BİNALAR HEM STUDIYALAR ENİDÄN TERTİPLENECEK

Canavar ayın (oktabri) 16-da Kişinev TİKA ofisin koordinatörü Atilla Cem KARAMOLLAOĞLU açıkladı, ani Gagauziyanın başkannık hem Halk Topluşu binasının hem da GRTnın enilenmesini yapmaa deyni TİKA 450 bin Euro verer.

Bu paraların 200 bin Eurosu harcanacak GHT binasının girişini, hayatlarını, merdivenlerini hem terasalarını tertiplemaa deyni. 250 bin Euro da harcanacak GRTnın stüdyaların düzmesinâ hem oborudovaniyanın enilenmesinâ.

Atilla Cem KARAMOLLAOĞLU urguladı, ani “neettâ var iki-üç ayın içinde bütün bu işleri başa çıkarmaa.”

BU GÖSELLİİ LÄÄZİM SADÄ SİİRETMAÄ



(Çekmesi 1-ci sayfada).

görecelär, Saray giyimnerinin gözellini hem Osmannı parlak zenginini. Zerä Osmannı giim biçimindä işlemä zanaatları önemli bir er alêr. Platların dokumasında hem boyamasında kullanılan dekorlar halizdän adetçä türk dekor zanaatının motivleri: saz yolu, hatayı (çizilär), selvi (kiparis), çintemani hem ilkyaz dalı.




Canabisi urguladı, ani “Osmannı vakıdında platlar eldä işlenirdi. Kullanılan dikmelär hem giisilerin çizgileri günümüze kadar yaşatılmış. Bu giisileri yapmaa üretmek kimär kerä aylar sürer. Defilede er alan kimi giisilerdeki şaşılacek işlemelär hem dikmelär platu bütünnä kaplêrlar. Gümüş hem altın işlemelärlän dikişlär giisilerin zenginini arttırêrlar.”

Sayın Mehmet Selim KARTAL, açılış sözünü başararak, urguladı: “Defilede adetçä Türk giisilerindän Bindal-

ı, Şalvar hem Üçetektän esinnenileräk hazırlanmış Kaftanlar, Saltalar, modern tualetlär hem sırma işli gelinniklär sergilenecektir. İyi siirlär...”

Bu sözlerdän sora siiredicilerä tekليف edildi Defileyi siiretmää. Hem vardı ne siiretmää. Türkiyedän hem Moldovadan manekennar, biri-biri ardı podiuma çıkıp, gösterdilər bu şaşılacek giimneri. Salonun üç katı da artık insan



efendi şükür ettilär hepsinä kim hazırladı hem yardımcı oldu bu gözäl Defile yortusunu hazırlamaa: Ankara Olgunlaşma İnstitutun zaametçilerine, talanlı manekennar, sponsorlara, Moldovada Türkiye Büyükelçiliin personalına hem hepsinä kim geldi o günü “MallDova” alış-veriş merkezine Defileyi siiretmää deyni.

Todur ZANET.

Fotolar – Dima SUFRAI.



“TOTALİTAR” TAŞ ERİNDÄ KALACEK

Moldova pravitelstvosunun binasının önündä “sovet okupaşiyasının hem totalitar komunist rejimin kurbannarını anmak için” koyulan taş erindä kalacek.



Bölä karar aldı Canavar ayın (oktäbri) 9-da Kişinevün Apelätiya palatası, inkär edip “Soluşiya” fondunun “sovet okupaşiyasının hem totalitar komunist rejimin kurbannarını anmak için” taşın kaldırılması için danışmasını.

Bu taş 2010-cu yılın Kirez ayın (iyün) 28-dä, ozamnki Moldovanın geçici Prezidenti Mihai GHİMPUNUN imzaladı Nr.376-V. Dekretina görä tamman Moldova pravitelstvosunun binasının önündä koyuldu, da sora bu erdä “sovet okupaşiyasının hem totalitar komunist rejimin kurbannarına anmak monumenti kurulacek”.

AAÇLIK KURBANNARINI ANDILAR

1946-1947 yıllarında olan açlık kurbannarını anmak için Kazayak küüyün Kurban gününä karşı burada bir çannarı çekmek anmak yapısının açılışı oldu. Açılış Allaha duaylan yapıldı.

Anmak yapısını kurmaa deyni kazayaklılar topladılar 350 bin leyi da dört ayın içindä düzdülär onu o erdä, neredä o tisi yıllarda bir kuyuya gömêrdilər açlıktan ölä insanları.

Not. 1946-1947 yıllarda gagauzlar karşı zorlan yapılan açlıktan herbir gagauz küüyündä öldü 40-60% insan. Kazayak küüyü ozaman 2000 insan kaybetti.

Foto – gagauzinfo.md.



Mariya MARUNEVIÇİ YILDÖNÜMÜNNÄN ANDILAR

Canavar ayın (oktäbri) 25-dä tamamlandı 75 yıl anılmış bilim hem cümne insanın Mariya Vasilyevna MARUNEVIÇİN (25.10.1937 – 15.02.2004) duuma günündän.

Bu olaylan ilgili Komratta iki “tombarlak masa” toplantıları oldu: Komrat Devlet Universitetinde hem Gagauziyanın M. MARUNEVIÇİN adına bilim araştırmaları Merkezindä.

İki toplantıda da Mariya MARUNEVIÇ için okundu dokladlar. (Dokladların birisini okudu Stepan BULGAR, angısının betterinä 2004-cü yılda Mariya MARUNEVIÇ raametli oldu). Anmak annatmakları açıklandı hem resim gösterileri oldu.

Mariya MARUNEVIÇ raametli olduynan gazetemız Canabisi için te nelär yazdıydı:

Mariya MARUNEVIÇ KİMDİ?

Duudu Mariya Vasilyevna 1937-ci yılın Canavar ayın (oktäbri) 25-dä, Komratta, çiftçi aylesindä. Komratta okulu başarıp, Kaul kasabasında pedagogika uçilişçesindä üürenmää başladı. Başardı uçilişçeyi artık Tiraspolä, zerä okulu bu kasabaya geçirdiydilər. Uçilişçedän sora Kişinev Devlet Universitetin istoriya hem filologiya fakultetini.

BİLİM YOLU

Universitetten sora Mariya MARUNEVIÇ Moldova Bilim Akademiyasının (MBA) etnografiya hem incäzanaat araştırma Bölümündä çalışmaa başladı.

1977-dä Moskvanın etnografiya İnstitutunda doktorluk disertatıyasını “Поселение, усадьбы и жилище гагаузов” korudu. Bilim uurunda 37 yazılı çalışması var, 3 monografiyanın avtoru.

MBAda Gagauzovedeniye Bölümünü kurdu. 1987-1990 yıllar arası bu Bölümdä baş bilim zaametçisi olarak çalıştı. Hep ozaman Kişinev İ.KRÄNGA adına Pedagogika İnstitutunda etnografiyada pedagog işledi.

KDUda ÇALIŞMASI

1991-ci yıldan beeri, Komrat Dev-

let Universiteti açıldıynan, son gününä kadar Mariya Vasilyevna burada Moldova istoriyasında baş üüredici hem Komrat Devlet Universitetin milli fakultetin cümne bilgilerin kafedrasının başı olarak çalıştı.

AVTONOMİYA İÇİN ÇALIŞMALARI

1989-dan beeri Gagauziya avtonomiyasının kurulması için çalıştı. “Gagauz Halkı” cümne-politika akıntısının öndercilerindän birisi, Gagauz Respublikasının Parlamentin deputatı. Gagauziya statusunu kurmaa deyni kanon temelini hazırlamak için kurulan komisiyaların çoyunda pay aldı. Gagauzların devletlii tanındıktan sora politikadan ayrırlıp, bilim çalışmalarına geçti.

BİLİM ARAŞTIRMA MERKEZİNDÄ ÇALIŞMASI

2001-ci yılda Gagauziya bilimnär araştıma hem üüretmək-metodikaların Merkezi kuruldu. O yılın Harman ayından (avgust) 2003-cü yılın Kırım ayınadan (dekabri) o Merkezin direktoru olarak çalıştı.

2004-cü yılın Büük ayın (yanvar) sonunda Gagauziyanın İşpolkomu kabletti karar Gagauziya bilimnär araştıma hem üüretmək-metodikaların



Merkezini kapamaa. İşpolkom saydı, ani Merkez prost işledi, onun faydası az hem orada finans distiplinasında kusuraqlar var.

Hep ozaman Gagauziyanın İşpolkomu aldı karar, ani regionda bilim araştırmalarını optimizaşılamaa deyni Gagauziyanın İşpolkomun yanında kurmaa bir istoriya, kultura hem üüredicilik uurunda bilim araştırmaları Soveti”. Sovetin direktoru Stepan BULGAR oldu.

Mariya MARUNEVIÇ savaştı annatmaa, ani bu yannış adım. Ani bilim bir-iki yılın içindä sadä filiz verer. Yalvardı, ani Merkezi kapamasınar. Ko Sovet ta olsun, ona da iş var, Merkez da çalışsın. Ama karar artık alınmıştı.

CAN DAYANAMADI

Büün zor söylemää, angı damna damarı patlattı. Ama yaşlı aslısı o - Küçük ayın 15-dä biz kaybettik Mariya MARUNEVIÇİ, istoriya bilgilerindä doktoru, doğentı, Gagauziyanın kurucularından birisini. Büün çoyu annamêêr kimi biz kaybettik. Ama yıllar geçtikçä bu kaybın paasını annamaa başlayacêz.

BİTKİ YOLU

Küçük ayın 18-dä Mariya Vasilyevna genä geldi Komrat Devlet Universitetinä, ama bu kerä tabut içindä. Universitetin hayatı insan doluydu. Kara giimli karılar, başkabak adamnar gelmiştilär bitki kerä prost olmaa o insannan, ani bütün kuvedini koydu ki Gagauziyamız, Universitetimiz biz gagauzlar dünneydä tanınalım.

Prost olmaa onunnan, kimin gagauzlar için bilim çalışmalarını Universitetler, Akademiyalar, Araştırma kuruluşları tanıdı. Yaslı mitingtä dünneyn herbir köşesindän gelän telegramalar okundu. Burada söz alannar yaşlarını zapaya koymazdı.

BAYRAKLAR İNDİRİLMEDİ

Yaslı mitingtan sora Mariya Vasilyevna MARUNEVIÇ bitki yoluna geçirdi: Universitetten, Klisenin hem Gagauziya Halk Topluğunun binasının yanından, mezarlaa, onun son hem daymaların-daymalarında evinä.

Gagauziya kurucularının birisi için Gagauziyada yas tutulmadı hem bayraklar indirilmedi.

MERKEZÄ M.MARUNEVIÇİN ADINI KOYMAA

Yaslı mitingta, insan arasında imza toplayarak, teklif edildi danışmaa Gagauziyanın İşpolkomuna ki, Gagauziya bilimnär araştıma hem üüretmək-metodikaların Merkezini dirildip, ona Mariya MARUNEVIÇİN adını koymaa.

Topracın ilin olsun, Mariya Vasilyevna. Allaa seni kabletsin hem prost etsin.

Todur ZANET. 28.02.2004 y.

YAZICIYLAN DİZGİNCEDÄ BULUŞMAK

Canavar ayın (oktäbri) 10-da Dizgincenin lişindü oldu buluşmak gagauz yazıcısının, poetlan hem dramaturglan Todur ZANETlän. Bu işin teklifi geldi lişin direktorundan Anna Andreevna KOLTOVAdan hem gagauz dili üüredicilerindän.

Buluşmak iki paya bölündü. İlk payında Dizgincä lişeyin üürencileri annattılar yaradıcının biografiyasından parçaları, okudular poetın peetlerini hem çaldılar onun türkülerini. Poet ta, kendi tarafından, annattı yaratmakları için hem okudu kendi eni peetlerini hem uşaklar için, hem da büüklär için.

Buluşmanın ikinci payında zalda bulunannara deyni gösterildi bilim


filmı “GAGAUZLAR HEM GAGAUZLUK” (filmın rejisöru hem ştenariy avtoru Todur ZANET).

Bu kultura yortusunda genç poet Georgiy PAVLOV okudu kendi peetlerini gagauz hem rus dilindä.

Maasuz buluşmak için Dizgincä lişeyin gagauz dilindä üüredicileri hazırlamıştilär bir stend, ani annadardı lişeyin bu günkü musaafiri için.

TÜRKİYE BÜÜKELÇİLİİNDÄN BİBLEOTEKAYA KİYATLAR

Geçennergä Moldovada Türkiye Büükelçisi Mehmet Selim KARTAL baashladı Komrat ATATÜRK bibliotekasına üzä yakın kıyat.



Kiyatların arasında var çok paalı hem siirek bulunan kıyatlar. Ölä nicä “Türk Dünyası gramer terimleri kılavuzu”, Yunus EMRENİN peetleri, “ATATÜRK” albomnarı, “Mevlana” (angliyca), Çingiz DAĞCİNİN bütün yaratmaları, Ahmet ESEVİNİN peetleri, Çingiz AYT-MATOVUN romannarı h.t.b.

Komrat ATATÜRK bibliotekası 1998-ci yılda Türkiyenin TİKA (Türk

İşbirlii hem Koordinaşiya Agenstvosu Başkannı) tarafından kuruldu. Büünkü gündä bibliotekada 5608 kıyat var. Burada bulunêr Gagauziyada hem Moldovada türk dünasını annadan en zengin bilim, kultura hem yaratmak kıyatların kolektıyası.

PATRETTÄ: Bibliotekanın direktoru Vasilisa TANASOGLU eni kıyatlarlan tanıştırêr.



Pötr ÇEBOTAR – 55 YAŞINDA!

Canavar ayın (oktabri) 9-da tamamlandı 55 yıl nicä dünneyä geldi gagauz yazıcısı, poet hem filolog Pötr Afanasieviç ÇEBOTAR.



Bu yıldönümünü Canabisi kutladı kendi ana küüyündä – Aydarda, küülülerin, üürencilerin hem üüredicilerin arasında.

Maasuz yıldönümünän ilgili olarak, Aydarın kultura Evindä oldu poetın yaratma avşamı hem ona baaşlanan yortulu konfert.

Yıldönümü günündä yazıcı Pötr ÇEBOTAR tanıştırdı insannarı kendi eni kiyadınnan “Aydar küüyü” hem küüyün gerbinnan.

“SAMURAY”lar ÇADIRDA DÜÜŞTÜLÄR

Artık edi yıl sıravardı Canavar ayında (oktabri) Çadır kasabasında olêr “Biyaz samuray” adlı “Kiokuşinkay kan karate” uşak turnırı.

Geçennerdä Çadır kultura Evindä bu turnırä toplandılar 50 zeedä sportsmen Moldovanın “Kiokuşinkay kan karate” Federatıyasının Belț, Çadır, Komrat, Kaul, Kişinev klublarından. Turnırı hazırladı Çadırdakı “Sakura” klubun trenetı Oleg ÇEBOTAR. Turnırın baş referısı oldu Federatıyanın başı “Sensey” Aurel KONDREA.

Yarışmalar iki kategoriyada oldu: “kumite” (düüşmeklär) hem “kata” (düüş tehnikasının hem çemrekliin gösterilmesi).

“Sakura” klubun sportsmenarı kendilerini bu turnırda pek islää gösterdiler. Onnar kazandılar 3 “altın”, 5 “gümüş” hem 9 “bronz” medali.

İlk kategoriyada birinci erleri aldılar Maksim PİLİPENKO (25 kiloyadan), Denis VATAMAN (30 kiloyadan)



hem Dimitri İSKİMCİ (35 kiloyadan). İkinci erdä Andrey TOPAL (30 kiloyadan), Nikolay TOPÇU, Vladislav KASIM hem Daniil SIRBOV (üçü da 35 kiloyadan). Üçüncü erdä Dimitri PAMUCAK (40 kiloyadan) hem Sergey DEREVENKO (45 kiloyadan).

“Kata” kategoriyasında Maksim PİLİPENKO ikinci hem Dimitri İSKİMCİ üçüncü oldular.

PATRETTÄ: Çadırdakı “Sakura” klubu.

Foto – “Aydın Açık” agentvosunun.

HERBİR UŞAAN AYLÄ HAKKI VAR!

Bitki vakıtlar çeşitli sebeplerä görä (taa çok ekonomika krizisin beterinä) Moldovada üü-süz uşakların sayısı zeedelendi. Gagauziyada insannarın bakışını bu problemaya çevirmää deyni “İntegraşıya” cümne kuruluşu hem Gagauziyanın GRT teleradio kuruluşu başladêrlar habercilik kompaniyasını “Herbir uşaan aylä hakkı var!”

Kompaniyanın neeti: soşial üüsüz-lüün problemlarını açıklamaa hem zor duruma düşän uşakların eni koruma biçimlerini ilerletmää. Onnarın arasında Gagauziyada aylä biçimindä evlär, geçici erleşmäk Merkezleri, aaretlik alan analar-bobalar terbi-edilmesi.



Büün, ekonomika krizisin sebebinä görä, büyüklerin çoyu kazanca giderlär. Bu insannar juridika tarafından uşakların bakmasını kiyada dökmeelär. Bişey olursa uşakları yok kim korusun ne sudlarda, ne medişına kuruluşlarında, ne da başka erlerdä. Vakıt geçtiynän kimi analar-bobalar uşakları üüsüz brakêrlar, para ya başka yardım yollamêrlar.

Soşial koruma bölümnerin açıklamasına görä Gagauziyada 5000 yakın soşial üüsüz uşak var (anasız-bobasız yaşayan). Onnarın yarısına soşial koruma yardımı lăâzım. Herbir uşaan aylä hakkı var. Aylä verer kolayını uşaklar kuvet, akıl, duygu hem psihologiya tarafından durmamayca ilerlesinnär.

Moldova zakonlarına görä soşial koruma yardımı var nicä yapılsın aaretlik alan analar-bobalar

terbi-edilmesinnän hem aylä biçimindä evlerdä. Bu uurda Moldovanın poyraz hem merkez rayonlarında çoktan bişeylär yapılêr. Gagauziyada sa bu iş başlangıç uurunda bulunêr. Sadä bu yılın Canavar ayında (oktabri) Çadırdakı İvançevların aylä biçimindä evi kanon tarafından tanındı. Bakmadaan ona, ani bu ev 2004-cü yıldan beeri çalışêr, sadä şimdi onnar devlettän para yardım kabletmää başlayaceklar.

Bundan kaarä durumu internatlar da kurtarêr. Bütün dünneydä internatlara kıynaş bakêrlar, ama Moldovanın üülen tarafında soşial üüsüzlöö durumunu Çadırdakı internat kurtarêr.

Vakıt gösterdi, ani erindeki bürokratlar istämeelär soşial koruma yardımında eni biçimneri kabletmää, zera bu iş için lăâzım olacak para ödensin erindeki bütetlardan. “Herbir uşaan

aylâ hakkı var!” habercilik kompaniyasının temel daavaları:

- Gagauziyada soşial üüsüzlök problemlarına cümne bakışını çevirmää hem bu uurda insannarın hem bürokratların sorumlunu üüselmää;

- Bakmaa ne uurda bulunêr Gagauziya insannarının haber bilgileri uşakların soşial korumasında eni biçim durumları için hem görmää onnarın aaretlik terbi-edilmesindä pay almakta hazır olmalarını;

- Uşakların soşial korumasında eni biçim durumları için Gagauziyanın insannarına açıklamalar yapmaa hem aaretlik terbi-edilmesindä kolaylıklar için haber vermää.

Not. “Moldovanın insan cümnesinin hem Haber Kuruluşların ortak çalışmasınan kuvettä bulunannarın cıvırcılığını hem açıklını zeedeletmää deyni” proekt çerçevesindä “Herbir uşaan aylä hakkı var!” cümne kompaniyasına arka olêr “Kontakt” Merkezi (Kişinev). Proektı ömürä geçirer: “İntegraşıya” cümne kuruluşu hem Gagauziyanın GRT teleradio kuruluşu. Habercilik yardımında bulunêrlar: “Ana Sözü” hem «Знамя» gazetaları, “Aydın Açık” telekompaniyası, Moldova 1 radiosunun “Bucaan dalgasında” kolverimi, Çadırdakı «Храм Казанской Божьей Матери» cümne kuruluşu.

Tatyana LİTVİNOVA,
“İntegraşıya” cümne kuruluşun başı.

İvan Antonoviç DYAÇUK
(06.12.1933 – 24.10.2012)

K o m -
ratta ge-
çindi Ga-
gauziyanın
k u l t u r a
hem cümne
insanı İvan
Antonoviç
DYAÇUK.



Yazıcı,
poet, lite-
ratura kritikacısı, incâzanaat
hem istoriya aaraştırmacısı,
medişınada bilim doktoru İvan
Antonoviç DYAÇUK yaşama-
sında çok işlär etiştirdi yapmaa.

Literatura hem kultura uurunda Canabisi, kendi yaratmalarından kaarä, hazırladı kiyatları «Очерки, литературно-критические публикации о развитии гагаузской литературы, изобразительного и других видов искусства, истории гагаузов и Буджака» (2000), «Гагаузское изобразительное искусство. Очерки, литературные портреты» (2001), «Избранные произведения о гагаузской литературе» (2003); «Избранная поэзия» (2004); «Путь к признанию» (gagauzlar için еропеуа роетасы, 2008), «Русско-гагаузско-турецкий разговорник» (2006), «Русско-гагаузско-молдавский разговорник» (2009), «Стихи и поэмы о гагаузах» (2009), «Антология гагаузской поэзии» (2010), а также «Стихи, посвященные гагаузским деятелям культуры» (2011).

Bundan kaarä Canabisinin literatura, kritika, referenzya, aaraştırma statyaları tiparlandılar Sovetlär Birlii, Moldova hem Gagauziya gazetalarında hem jurnallarında, ölä nicä «Советская культура», «Молодёжь Молдавии», «Вечерний Кишинёв», «Literatura şi arta», «Независимая Молдова», «Кодры», «Нистру», «Kultura», «Вести Гагаузии», «Единая Гагаузия», «Haberlär» hem başka.

Canabisi kurdu Komrat sanepidemstanşiyasını hem çok yıllar orada baş doktor olarak çalıştı.

İvan Antonoviç DYAÇUK “Gagauz Halkı” cümne akıntının azasıydı. Gagauz Respublikasının kurulması çalışmaları için Gagauziya medalilerinnän ödüllendi.

Topracı ilin olsun!

“Ana Sözü” redakşiyası.

“ANA SÖZÜ” Gagauz dilindä gazeta

Çıkêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basılêr
Tiraj – 3000 ekz. Sımarlamak No: 7207.

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 28-18-04

e-mail: todur.zanet@gmail.com
zanet@anasozu.com